

ORDENANZA REGULADORA DA LIMPEZA OBRIGATORIA DE TERREOS FORESTAIS E DE SOARES EN SOLO URBANO OU DE NÚCLEO RURAL E OUTRAS ACCIÓNS PREVENTIVAS CONTRA OS INCENDIOS FORESTAIS

PREÁMBULO:

O monte e os solos agrícolas desempeñan neste municipio unha tripla funcionalidade: social, ambiental e económica.

Dentro do cadro xeral de competencias establecidas para o municipio, tanto na Lei 7/1985, reguladora das bases do réxime local, como a Lei 5/1997, do 22 de xullo, de administración local de Galicia, nos artigos 25 e 80 respectivamente, atópanse atribuídas varias que son converxentes polo que ao interese público significa, respecto aos montes, como son os incendios, a protección civil e o medio ambiente, todos eles en canto contribúen a satisfacer necesidades e aspiracións da comunidade veciñal.

Coa presente norma a Corporación de Val do Dubra quere expresar e manifestar o seu compromiso, dentro da súa política municipal, de defensa do medio rural.

É necesario ter un instrumento xurídico eficaz que, con suxeición á xerarquía normativa, permita actuacións que lexitime á administración da entidade local nas tarefas de prevención de incendios.

As accións recollidas na presente ordenanza complementáanse coa ordenanza fiscal correspondente para a percepción do reintegro dos gastos que o Concello realice polos traballos substitutorios en caso de inactividade dos particulares, ante as ordes de requirimento para o cumprimento das fins recollidas no seu texto articulado.

CAPÍTULO I.- DISPOSICIÓNS XERAIS

Artigo 1:

Competencia.- A presente ordenanza dítase segundo as facultades concedidas polos artigos 25 en relación co 84 da Lei 7/1985, do 2 de abril, reguladora das bases do réxime local, Lei 3/2007 de prevención e defensa contra os incendios forestais de Galicia, artigos 9 e 199 da Lei 9/2002, de ordenación urbanística e protección do medio rural de Galicia e 80 da 5/1997, do 22 de xullo, de administración local de Galicia.

Artigo 2:

Obxecto e natureza.- Esta ordenanza persigue fins municipais de policía urbana e rural e de prevención de incendios pretendendo ser complementaria das disposicións xerais reguladoras das materias propias da súa natureza.

Artigo 3:

Definicións.- Para os efectos da presente ordenanza, defínense os seguintes termos:

A) Monte ou terreo forestal: todo terreo no que vexeten especies forestais arbóreas, arbustivas e matorral ou herbáceas, sexa espontaneamente ou procedentes de sementeira ou plantación, que cumpran ou poidan cumprir funcións ambientais, protectoras, produtoras, culturais, paisaxísticas ou recreativas.

Teñen tamén a consideración de monte ou terreo forestal os demais terreos descritos no artigo 5 da Lei 43/2003, do 21 de novembro, de montes.

Ademais e para os efectos do cumprimento da presente ordenanza, poderán ter a consideración de monte aquelas superficies que estean clasificadas como terreo rústico de protección agropecuaria que reúnan as características recollidas no artigo 5.1 da Lei 43/2003, en canto subsista o seu uso forestal.

B) Solo de núcleo rural: os terreos clasificados como tales no planeamento urbanístico ou aqueles outros que constituíndo un conxunto de edificios contiguos ou próximos distanciados entre sí un máximo de cincuenta metros e con oito ou máis edificacións, constituíndo o seu perímetro a liña poligonal pechada que, englobando todos os edificios, delimite a menor área posible.

C) Soar: terán a consideración de soares as superficies aptas para edificar que reúnan os requisitos establecidos no artigo 16 da Lei 9/2002 de ordenación urbanística e protección do medio rural de Galicia

D) Faixas de especial protección: son a totalidade das parcelas que se atopen fóra do monte a menos de vinte e cinco metros do seu perímetro.

Son tamén a totalidade dos terreos forestais, rasos ou arborados, que se sitúen dentro do monte a menos de dez metros do seu perímetro.

Así mesmo son faixas de especial protección unha franxa de vinte e cinco metros arredor de calquera edificación, urbanización, obras e instalacións industriais, eléctricas ou infraestruturas de transportes situadas a menos de catrocentos metros do monte.

E) Solo rústico de protección agropecuaria: son os así definidos no planeamento urbanístico municipal. Entre eles atópanse as parcelas resultantes das operacións oficiais de concentración parcelaria.

F) Repoboación forestal: é a introdución de especies forestais nun terreo mediante de sementeira ou plantación.

G) Forestación: repoboación, mediante sementeira ou plantación, dun terreo que era agrícola ou dedicado a outros usos non forestais.

H) Reforestación: é a reintrodución de especies forestais por medio de sementeira ou plantación en terreos que xa estiveran poboados forestalmente ata época recente pero que quedaron rasos a causa de talas, incendios, vendavais, pragas, enfermidades ou outros motivos.

I) Puntos de augas: son aqueles pozos de dominio público, pechados, cuxas augas se destinan a abastecer aos medios contra incendios, tales como cisternas, helicópteros e outros análogos.

CAPÍTULO II.- LIMPEZA DE TERREOS

Artigo 4:

Obrigas dos propietarios.- Os propietarios dos terreos situados nas faixas de especial protección están obrigados a manter as súas parcelas así como os camiños de titularidade privada e as súas gabias limpos de maleza e restos, así como a ter a masa arbórea rareada.

Así mesmo a todo propietario de soar quedalle expresamente prohibido manter ou verter neles lixos, residuos de calquera tipo ou natureza, entullos ou maleza.

Artigo 5:

Execución.- Para a realización dos traballos necesarios para cumprir as obrigas do artigo anterior os propietarios poderán:

- A) realizar directamente os traballos no tempo que fixe o Concello.
- B)realizalos polo Concello previa solicitude e cos que se asinará o correspondente convenio con suxeición ás taxas correspondentes.
- C) execución subsidiaria dos traballos por parte do Concello nos casos en que non foran efectuados polos seus propietarios unha vez feito o requirimento.

Artigo 6:

Procedemento.- O Concello durante o mes de marzo confeccionará a relación de propietarios e parcelas que teñan obriga de facer os traballos de limpeza determinados no artigo anterior.

Artigo 7:

Prazos.- Durante o mes de abril procederase a notificar o requirimento aos propietarios afectados e asemade publicaranse no Boletín Oficial da Provincia, de tal xeito que os traballos dean comezo o día primeiro de maio de cada ano.

Artigo 8:

Audiencia.- No prazo de dez días dende a notificación ou da publicación do requirimento os propietarios poderán, polo trámite de audiencia, alegar o que consideren conveniente aos seus intereses.

A resolución correspondente seralles novamente notificada outorgándolles o correspondente recurso de reposición que non paralizará a execución do requirimento.

CAPÍTULO III.- MEDIDAS DE SEGURIDADE

Artigo 9:

Distancias mínimas de plantación.- Quedan establecidas as seguintes:

1.- Por razóns de seguridade:

A) especies de crecemento rápido como o eucalipto ou o chopo: 50 m a vivendas ou instalacións.

B) resto de especies, 25 m a vivendas ou instalacións e 50 m cando a proximidade sexa a industrias e instalacións perigosas.

2.- Pola natureza dos terreos:

A) terreos forestais lindantes con terreos de protección agropecuaria, as distancias aos lindeiros serán:

1) Eucaliptos e chopos: 50 m das colleitas

2) Resto de especies, tales como piñeiro, abetos ou similares: a 10 m

B) terreos agropecuarios lindantes con terreos tamén de protección agropecuaria, as distancias aos lindeiros serán:

1) viñado: a 10 m

2) os setos compostos de matorral ou calquera tipo dos permitidos na presente ordenanza será de 3 m

3) ás árbores froiteiras a 4 m

C) terreos forestais lindantes con outros terreos forestais, as distancias aos lindeiros serán:

1) nas especies do xénero eucaliptus a distancia mínima será de 25 m de monte a monte

2) nas especies de coníferas, tales como piñeiro, abetos e similares, a distancia mínima será de 3 m

3) nas especies de frondosas con porte forestal, tales como carballos, castiñeiros, cerdeiras e chopos, a distancia mínima será de 4 m

4) nas especies de frondosas con porte froiteira, tales como castiñeiros, cerdeiras, maceiras, nogueiras ou concheiros a distancia mínima será de 4 m

3.- Pola proximidade a estruturas e servizos públicos:

A) con respecto a núcleos rurais e urbanos:

1) nas especies do xénero eucaliptus a distancia mínima será de 100 m

2) nas especies de coníferas será de 100 m

3) nas especies de frondosas con porte forestal a distancia mínima será de 25 m

4) nas especies de frondosas con porte froiteira distancia mínima será de 6 m

B) con respecto a fontes naturais e manantiais de uso público:

1) nas especies do xénero eucaliptus a distancia mínima será de 100 m

2) nas especies de coníferas será de 100 m

3) nas especies de xénero populus (chopo) a distancia mínima será de 15 m

4) nas especies de frondosas con porte forestal a distancia mínima será de 10 m

5) nas especies de frondosas con porte froiteira distancia mínima será de 10 m

C) con respecto a cursos de auga, ríos e regatos: para todas as especies a distancia mínima será a que estableza o Organismo Autónomo Augas de Galicia.

D) con respecto ás conducións de auga (tuberías): para todas as especies a distancia mínima será de 5 m a cada lado da condución.

E) con respecto a liñas eléctricas: para todas as especies a distancia mínima será a que segundo o tipo de liña se teña establecido dentro da normativa sectorial que é de 8 m para baixa e media tensión e de 15 m para alta tensión

F) con respecto a vías públicas municipais: para todas as especies a distancia mínima será de 4 m contados dende a arista exterior da vía pública entendéndose que a tal arista é o bordo exterior da gabia do camiño ou estrada destinados a circulación.

Artigo 10:

Outras prohibicións.- Queda prohibida facer repoboacións:

- A) en solo urbano e de núcleo rural
- B) en zonas dedicadas a labradío, cultivos, prados ou pastos
- C) facelo con especies como acacia ou mimosa

Artigo 11:

Mantemento de repoboacións forestais.- Os seus propietarios están obrigados a mantelas en todo momento limpas de maleza, en condicións axeitadas para a prevención e mellor defensa contra os incendios forestais sen restos e xermolos de árbores.

Artigo 12:

Permisividade.- Permítese a plantación de xardíns e árbores illadas con presentación previa ante o Concello do correspondente informe dun técnico agrícola onde se fixen as consecuencias do seu emprazamento en relación á prevención de incendios forestais relacionando as especies de que se vai a compoñer o axardinamento ou as árbores illadas.

Artigo 13:

Xestión da biomasa forestal.- A xestión da biomasa forestal levarase a cabo conforme aos criterios da Orde do 31 de xullo de 2007 da Consellería do Medio Rural (DOG do día 7 de agosto)

CAPÍTULO IV.- INFRACCIÓNS E SANCIÓNNS

Artigo 14:

Definición das infraccións.- Constitúe infracción desta ordenanza as accións ou omisións que vulneren o seu contido:

- ÿ A) non cumprir a orde de execución das obras para manter os terreos, urbanización de iniciativa particular e edificacións ou instalacións en condicións de funcionalidade, seguridade, salubridade, ornato público e habitabilidade segundo o seu destino, e de acordo coas normas de protección ao medio ambiente, do patrimonio histórico e da rehabilitación, tal como dispoñen os artigos 9 e 199 da Lei 9/2002, do 30 de decembro, de ordenación urbanística e protección do medio rural de Galicia e 24 do Regulamento de disciplina urbanística (RD 28/1999 do 21 de xaneiro).
- ÿ B) non respectar as medidas preventivas de protección contra incendios forestais incumprindo o deber de manter limpo de maleza ou calquera outro material que facilite a propagación do lume dentro das distancias de seguridade sinaladas nesta ordenanza.
- ÿ C) realizar novas plantacións de árbores coníferas dentro da franxa de protección fixada nesta ordenanza.

As infraccións ás que se refire os apartados anteriores serán sancionadas con multas coercitivas que varíen entre 150,29 e 300,06 euros, ata un máximo de 10 e responden para que, en caso de incumprimento dunha orde de execución por infracción desta ordenanza, a administración municipal optará pola execución subsidiaria ou a execución forzosa mediante a imposición de multas coercitivas reiterables mensualmente ata acadar a execución polo suxeito obrigado.

Artigo 15:

Tipificacións das infraccións.-

1. As infraccións a esta ordenanza clasificaranse en moi graves, graves e leves:

Y A) Son infraccións moi graves: accións e omisións que constitúan incumprimento das normas que afecten á seguridade e salubridade das edificacións e terreos, así como incumprimento das medidas de prevención contra incendios forestais sinaladas nesta ordenanza durante os meses de verán, que supoñan un risco grave contra a seguridade de persoas ou bens en caso de incendio.

Y B) Son infracción graves: as accións ou omisións que constitúan incumprimento das normas que, relativas a seguridade e salubridade ou ornato que afecten levemente á salubridade/seguridade de persoas ou bens, así como as medidas de prevención contra incendios forestais sinaladas nesta ordenanza que supoñan un risco evidente contra a seguridade de persoas ou bens en caso de incendio e a nova plantación de árbores dentro da franxa de protección fixada nesta ordenanza.

Y C) Consideraranse infraccións leves as infraccións a esta ordenanza que non teñan carácter de moi graves ou graves

2. En ningún caso poderá o Concello deixar de adoptar as medidas tendentes a restaurar a orde perturbada/vulnerada así como a facer efectivas as medidas de prevención e protección contra incendios forestais, polo que procederá tras o apercibimento, á execución forzosa, por medio da execución subsidiaria, realizando os correspondentes actos por si ou a través das persoas que se determine a custa do obrigado.

Artigo 16:

Incumprimento.- No incumprimento das ordes de execución por razón de salubridade e hixiene ou ornato serán responsables as persoas que teñan o dominio útil.

Artigo 17:

Sancións.- Para graduar as multas atenderase primordialmente á gravidade das materias, á entidade económica dos feitos constitutivos de infracción, á reiteración da persoa responsable e grao de culpabilidade de cada un dos infractores.

Artigo 18:

Sancións por faltas moi graves.- Sancionaranse con multas de 1803,04 a 3005,06 euros

Artigo 19:

Sancións por faltas graves.- Sancionaranse con multas de 601,03 a 1803,03

Artigo 20:

Sancións por faltas leves.- Sancionaranse con multas de 150,25 a 601,02 euros

Artigo 21:

Procedemento.- O órgano competente para resolución do procedemento sancionador é o alcalde, conforme co que dispón o artigo 21.1.k) da Lei 7/1985, do 2 de abril, reguladora das bases do réxime local.

Artigo 22:

A potestade sancionadora exercerase segundo o establecido no Regulamento do procedemento do exercicio da potestade sancionadora, aprobado por RD 1398/1993, do 4 de agosto.

Artigo 23:

Caducidade.- O prazo para resolver o procedemento sancionador será dun ano contado dende a data da súa incoación.

Transcorrido o dito prazo sen resolver producirase a caducidade do procedemento.

No suposto de que a infracción non prescribira deberá iniciarse un novo procedemento sancionador.

Artigo 24:

Prescripción.- As infraccións moi graves a esta ordenanza prescribirán aos 6 anos, as graves aos 3 e as leves ao ano dende que se produciu o feito ou se formulou requirimento de execución.

Artigo 25:

Recursos.- Contra as resolucións da Alcaldía ou órgano competente en caso de delegación nas que se plasmen ás obras de execución que poñan fin vía administrativa cabe interpor recurso contencioso-administrativo ante o xulgado competente.

DISPOSICIÓN FINAL:

A presente ordenanza que consta de 25 artigos e unha disposición final, entrará en vigor unha vez aprobada definitivamente polo concello e publicado o seu texto no Boletín Oficial da Provincial transcorrido o prazo previsto no artigo 65.2 da Lei 7/1985, do 2 de abril.